


EDICION SPECIAL HIMNO Y BANDERA

Oranjestad a haya su nomber na aña 1824



Na aña 1824, Oranjestad a haya su nomber. Awendia ya Oranjestad ta un ciudad cu un inversion total multibilionario consistiendo di edificionan commercial y monu-



mental, barionan residencial, facilidadnan turistico, medico, educacional, cultural, di telecomunicacion y di un variedad religioso, waafnan industrial y turistico, centro nan financiero, gubernamental y legal.

Mientrastanto e poblacion di Paardenbaai a crece di 32 cas na 1805 pa un impresionante 185 cas na 1824. Aña 1824 a trece un cambio grandi pa e isla di Aruba ora cu e hobencito Willem Rasmijn a haya oro na Aruba. E Commandeur Jacob Thielen a manda raporta na Gouverneur Paulus Cantz'laar tocante e descubrimiento aki. E hayazgo tabata di hopi importancia pasobra te e ora ey e isla di Aruba tabata considera un isla sin tera fertil y di poco interes pa e gobierno colonial y no ta tin mucho cos di raporta prome cu e hecho aki. Desde cu Peter Stuyvesant, cu tabata director di Westin-

dische Compagnie di colonia Corsow entre 1634 pa 1644, ningun Gouverneur a bishita e isla di Aruba, pero cu e hayazgo di oro aki Gouverneur Paulus Cantz'laar a dicidi di bishita Aruba, bishita cu tabata tin como mision principal pa establece reglanan pa cu e explotacion di oro. E Gouverneur a bin Aruba cu un entourage masha grandi mes for di Corsow. E bishita aki a tuma lugar na Augustus 1824. Durante e estadia di Gouverneur Paulus Cantz'laar a dicidi pa tene un recepcion na honor di e Gouverneur. E Gouverneur a keda impresiona cu e pueblo na Paardenbaai y a dicidi cu e "dorp aan de Paardenbaai" lo mester haya un nomber y cu e mester ta un nomber di e cas real. Ya ta tin Willemstad na e isla di Corsow, e ora a bin e sugerencia: Oranjestad.